

Kuunganishwa kama Wana wa Mungu

Kwa kuwa ninyi nyote mmekuwa wana wa Mungu kwa njia ya imani katika Kristo Yesu—**Wagalatia 3:26.**

Ni nadra kupata watu wawili wanaofanana kabisa. Miongoni mwa wanadamu kadhalika na miongoni mwa ulimwengu wa asili, kuna tofauti. Umoja katika utofauti kwa watoto wa Mungu—udhihirisho wa upendo na uvumilivu kwa kujali tofauti ya silka—huu ndio ushuhuda kwamba Mungu alimtuma Mwanawe ulimwenguni ili kuwaokoa wenye dhambi.

Umoja ambao upo kati ya Yesu na wanafunzi Wake hauharibu haiba ya mtu awaye yote. Kwa akili, kusudi na kwa tabia ni wamoja, lakini sio kwa nafsi. Kwa kuwa washirika wa Roho wa Mungu, kwa kukubaliana na sheria ya Mungu, mtu anakuwa mshirika wa asili ya Uungu. Yesu anawaleta wanafunzi Wake katika muungano ulio hai na Yeye pamoja na Baba. Kupitia kwa utendaji kazi wa Roho Mtakatifu katika akili ya mwanadamu, mtu anakamilishwa ndani ya Yesu Kristo. Muungano na Yesu huanzisha mfungamano wa umoja na mtu mwingine. Umoja huu ndio uthibitisho wa hakika kwa ulimwengu wa ukuu na wema wa Yesu na uweza Wake wa kuondoa dhambi.

Mamlaka za giza hazina nafasi dhidi ya waumini wanaopendana kama Kristo alivyowapenda, wanaokataa kuunda utengano na ugomvi, ambao husimama pamoja, ambao ni wema, wenye staha na wapole, watunzao imani itendayo kazi kwa upendo na kuitakasa roho. Ni lazima tuwe na Roho wa Kristo, ama sivyo sisi si watu Wake.

Katika umoja kuna nguvu; katika utengano kuna udhaifu.

Kadiri tunavyokuwa na muungano wa karibu na Yesu, ndivyo tutakavyokuwa na muungano wa karibu sisi kwa sisi. Utofauti na kutoridhika, ubinafsi na majivuno, hupambana kushika hatamu. Haya ni matunda ya moyo uliogawanyika, uliotayari kupokea mapendekezo ya adui wa roho. Shetani anafurahia sana pale anapootesha mbegu za mafarakano.

Katika umoja kuna uzima, nguvu, ambayo haiwezi kupatikana kwa njia nyingine yoyote.